

2003KO URTARRILAREN 30EKO
OHIKO OSOKO BILKURA

Lazkaoko Udaletxean, bi mila eta hiruko urtarrilaren hogeita hamarrean, iluntzeko zazpitan, Lazkaoko Udal Osoa biltzen da, aurrez honetarako deialdia egin delarik, Felix Urkola Iriarte Alkatearen lehendakaritzapean, ohiko batzaraldia egin asmoz.

Bertaratutako zinegotziak honako hauek dira: Igor Sarriegi Zumarraga, Gorka Lamy Intsausti, Arantxa Zumelaga Agirre, Irantzu Amundarain Irizar, Jon Agirre Garmendia eta Urko Irastortza Aldanondo.

Joseba Hernandez Madinabeitia, Juan Manuel Serna Portugal eta Jose luis Otamendi Romero zinegotziak ez dira bertaratu.

Aktan adieraziko da Inazio Estensoro Eskisabel zinegotzia bertaratzen deneko unea.

Idazkari lanetan Iñaki Eskisabel Zurututzak dihardu.

I.- AURREKO AKTA-

Alkateak bilkurari hasera eman ondoren, bertaratutakoen onespenera aurkezten da 2002ko abenduaren 19an egindako bilkurako akta, idatzita dagoen moduan onartzen delarik.

II.- ALKATETZAREN EBAZPENEN BERRI EMATEA-

Ondoren Alkateak azken Osoko Bilkuratik gaur arte emandako Alkatetzaren Ebazpenen berri emten du, ebazpen hauen zenbakizko laburpen baten bidez.

Osoko Bilkura jakinaren gainean gelditzen da.

III.- BIZTANLEEN UDAL ERROLDA 2003-01-01 DATARA-

Udaleko Zerbitzu Teknikoek 2003ko urtarrilaren 1 datara Biztanleen Udal Erroldaren zuzenketa prestatu dutelarik, Osoko Bilkurara aurkezten dira zuzenketa honen zenbakizko emaitzak, bere onarpenerako.

Zuzenketa honen arabera, Lazkaok bost mila eta hirurogeita hamasei (5.076) biztanle zituen 2003ko urtarrilaren 1ean. Zenbaki hau ondorengo eragiketen emaitza dugu:

KONTZEPTUAK	GUZTIRA	GIZONEZKOAK	EMAKUMEZKOAK
Biztanlegoa 2002-01-01 datara	5.027	2.601	2.426
Altak 02-01-01etik 2003-01-01era	269	135	134
Bajak 02-01-01etik 2003-01-01era	168	120	100
Biztanlegoa 2003-01-01era	5.076	2.616	2.460

...///...

.....			
-------	--	--	--

Osoko Bilkurak, bertaratutako bere partaide guztien aldeko botuz, 2003ko urtarilaren 1 datara egindako Biztanleen Udal Erroldaren zuzenketa hau onartu egiten du.

IV.- SAN JOSEKO BIRRURBANIZAZIO LANEN 5. ZERTIFIKAZIOA.-

San Joseko Berrurbanizazio lanen obra zuzendaritza daraman INJELAN, S.L. enpresako Iñaki Laskurain Gisasola injenieroak lanen bostgarren zertifikazioa aurkeztu du. Bostgarren zertifikazio hau EHUN ETA BERROGEITA BEDERATZI MILA SEIREHUN ETA LAU EURO ETA BERROGEITA HAMAZAZPI ZENTIMOkoa (149.604,57 €) da.

Zertifikazioa aztertu ondoren, Osoko Bilkurak, bertaratutako bere partaide guztien aldeko botuarekin, berau onartzea erabakitzen du.

Une honetan Estensoro zinegotzia bertaratu da.

V.- HIRILURREN GAINEKO ZERGA INDUSTRI GUNEETAN.-

Iaz katastro balore berriak sartu ziren indarrean hirilurrei dagokienean eta horrekin batera Ondasun Higiezinaren gaineko Zerga ondorioetarako karga tasak, Udalak ezartzen dituenak, bi izango zirela finkatu zen, bata egoitza guneetarako eta bestea industri eta tertziario guneetarako.

Orain, Gipuzkoako Foru Diputazioak, azaroaren 25eko 9/2002 Foru Arauaren bidez, industri guneetarako karga tasaren muga milako 5era igo du 2003 urterako eta milako 6ra 2004 urterako.

Alkateak esaten du muga hori igotzearena ez dakiela zergatik izango zen, behar bada industri guneetako baloreak bajuxamar galditu direla irudituta edo behar bada Jarduera Ekonomikoen gaineko Zerga kentzea aurrikusten delako. Dena den, jarraitzen du, Lazkaon ere industri guneetako karga tasa milako 5ean jartzea proposatzen da, ikusita gainera Beasain eta Ordiziak ere hala jarri dutela. Gaineratzen du karga tasa honek industri guneetan dauden egoitza etxeei ez liekela ukituko.

Osoko Bilkurak, gaia aztertu ondoren, bertaratutako bere partaide guztien aldeko botuarekin, 8 botu, Udal Osoa 11 lagunek osatzen dutelarik, eta beraz Udalaren legezko gehiengo osoaren aldeko botuarekin, honako akordioak hartzen ditu:

- 1.- Ondasun Higiezinaren gaineko Zergaren industri eta tertziario guneetarako karga tasa milako 5ean ezartzen dela haserako izaeraz onartzea.
- 2.- Aurreko puntuko akordioa jendaurreko erakustaldian jartzea 30 egunetako denboraldian.
- 3.- Jendaurreko denboraldian inolako erreklamaziorik aurkeztuko ez balitz, haserako onarpena behin betikoa bihurtzat joko da, akordio espreso berri baten beharrik gabe.
- 4.- Azaroaren 25eko 9/2002ko Foru Arauaren Bigarren Xedapen Iragankorrean oinarriturik, akordio honen ondorioak 2003 urtetik hasita izango ditu.

...///...

...///...

VI.- BALTASAR GARZONEN AUTOAREN AURREAN BATASUNAREN MOZIOA ETA ALKATEAREN MOZIO ALTERNATIBOA-

Batasunaren mozioak honela dio:

“Nazio Batuen Erakundeak onartutako Eskubide Zibil eta Politikoen Itunaren 1. artikuluan agertzen da Autodeterminazio Eskubidea. Hain maila gorena duen eskubidea izan arren, bere aurkako adierazpen eta eraso ugari jasan behar izan dugu Euskal Herrian. Urrunago joan gabe, urriaren 16an Madrileko Audientzia Nazionaleko Instrukzioko 5. zenbakiko Epaitegi Zentraleko Garzon epaileak, 35/2002 sumarioaren barruan, kaleratutako auto berria hortxe daukagu. Epaile honek, -Espainiako Gobernuaren eta Espainiako hainbat komunikabide eta estamentu, politiko, juridiko, sozial eta militarren babesarekin- traiektoria luzea du Euskal Herriaren eta euskal herritarren aurkako ebazpenak ematen eta inolako oinarri juridikorik ez duten autoak ateratzen.

Oraingo honetan, autoak duen intentzionalitate politiko nabariaz gain, Euskal Herriaren errealitate sozialari buruzko interpretazio zentzugabeak egiten ditu, nolabaiteko obsesio baten isla izan daitezkeenak. Honela, besteak beste, legean oinarriturik egiten diren “jaiotze berrien erregistro aldaketak” hauteskunde erroldaren manipulaziotzat jotzen du; nazioarteko zuzenbideak definitzen eta arautzen duen autodeterminazio eskubideari buruzko burutazio eta asmakizun izugarriak planteatzen ditu, berez eskubidea dena delitu bihurtu arte; Batasuna erakunde politikoaren lan ildoetako buruzko interpretazio subjektibo eta bitxiak egiten ditu; kargu publikoen balizko ordezkapenei buruz mintzatzen da; hauteskundeetako emaitzak nazien garaiko Alemanian gertatutakoaz parekatzen ditu,

Finean, Garzonek bere marka guztiak hautsi egin ditu eta, auto berri honekin, Espainiako justizia sistemaren benetako aurpegia erakusten digu: Gobernuak dituen beharri-zan politikoaren menpekoea eta interes politikoaren arabera.

Oraingoa, ordea, ez da epaile honen jokaera kuestionatuta izaten den lehendabiziko aldia. Izan ere, begi bistakoa da epaile honek hartzen dituen erabaki gehienek duten oinarri eta fundamentu juridiko falta, bai eta Estatuko Gobernuak duen interes politikoekiko erabateko atxikimendua. Gasteizko Gobernuak behin baino gehiagotan adierazi du epaile honek prebarikazio-delitua egin duela bere ebazpenekin eta beraren aurkako kereila aurkeztu du Espainiako Epaitegi Gorenaren aurrean, kereila honetan, besteak beste, segurtasun-falta juridikoa sortaraztea leporatzen dio epaile honi, bai eta oinarritzko eskubide batzuen urraketarako neurriak hartzea.

Hau guztia dela eta, honako erabakiak hartzea proposatzen da:

- 1) Udal honek Nazio Batuen Erakundeak onartutako Eskubide Zibil eta politikoen Itunaren 1. artikuluan agertzen den Autodeterminazio Eskubidea berretsi eta bere aldeko defentsa irmoa egingo duela aldarrikatzen du.
- 2) Udal honek erabateko desadostasuna adierazten du, Garzon Epailearen 2002ko urriaren 16ko autoaren aurrean. Epaileak Euskal Herriko errealitateaz egiten duen kontaketa zeharo faltsua da eta euskal herritarrentzako iraingarria. Gainera, epailearen jarrerak eta autoaren edukiak Euskal Herriko bizitza politikoan onartu ezinezko hamaikagarren esku-hartzea suposatzen dute. Batetik, autoak inolako oinarri juridikorik ez duelako, eta bestetik, lehendabizi akusazioak egiten direlako eta, ondoren, akusazioak mantentzeko frogak eskatzen direlako. Akusazioa aldeztu aurretik egiten da, frogetan eta irizpide objektiboetan oinarritu gabe.

...///...

...///...

- 3) Udal honek, Garzonen auto berri honetan ematen den Autodeterminazio Eskubidearen kriminalizazio saioa salatu egiten du. Honen helburua, nazioarteko zuzenbideak jasotzen duen funtsezko eskubide honen balizko gauzapenerako oztopoak jartzea da, epaile bati ez dagozkion funtzio eta balorazio politikoetan sartuz.
- 4) Udal honetatik, berretsi egiten dugu proiektu politiko guztiak zilegiak direla eta, beraz, bere defentsa eta gauzapenerako aukera berdinak izan behar dituztela.”

Alkatearen mozio alternatiboak honela dio:

“Baltasar Garzon Epaileak 2002ko urriaren 16an emandako autoaren aurrean:

- 1.- Urriaren 16an Entzutegi Nazionaleko Epaile den Baltasar Garzonek emandako autoaren aurrean gure desadostasuna adierazi nahi dugu. Oraingoan ere, bistan geratzen da, argudio juridikoen gainetik, bultzada politikoak direla epaile “berezi” honen jokabidea mugitzen dutenak.
- 2.- Auto honetan jasotzen diren orokortasunak eta baloraziak arriskutsuak direla deritzogu, euskal gizartearen irudi distortsionatua eskainiaz, eta hainbat planteamentuaren gainean itzalak sortuz.
- 3.- Hainbatetan Udal honetan adierazi denari jarraituz, berretsi egiten dugu egitasmo politiko demokratiko oro defendatu, garatu eta, heritarren gehiengoaren babesa badauka, gauzatzeko aukera egon behar duela. Horretarako, ezinbestekoa da aukera politiko guztien ordezkaritza askea eta defentsa eraginkorra errespetatzea, arau demokratikoei eta politikak eskaintzen dituen mekanismoak direlarik borondate kolektiboa eratzeko erabili behar diren bakarrak.”

Bozketan jarri eta Osoko Bilkurak, aldeko 3 botu (EH) eta aurkako 5 botuz (EAJ, EA) Batasunaren mozioari ezetza ematea erabakitzen du.

Jarraian Alkatearen mozioa jartzen da bozketan eta Osoko Bilkurak, aldeko 5 botu (EAJ, EA) eta aurkako 3 botuz (EH) mozioa onartzea erabakitzen du.

VII.- GALDERA ETA ERREGUAK.-

Alkateak San Joseko birrurbanizazio lanetarako Gipuzkoako Foru Diputazioak eman duen diru-laguntzaren berri ematen du. Dirulaguntza Hirigintzako Degradatutako Guneetarako eman dituzten dirulaguntzen artean kokatzen da eta 590.000,- eurotakoa da.

VIII.- BILERAREN AMAIERA.-

Eta eztabaidatzeko beste gairik ez dagoenez, Alkateak bilera amaitutzat jotzen du, gaueko 7ak eta 25 direnean nik, Idazkariak, guztiaren akta jaso eta ziurtatzen dudalarik.

...///...